

**Nunat Avannarliit Killiit Siunnersuisoqatigiiffiata aalajangersagaa nr. 3/2009 Inatsisartunit taperserneqarnissaa pillugu Inatsisartut aalajangiiffigisassaattut siunnersuut, aalajangersagaq ima oqaasertaqarpoq:**

**Nunani avannarlerni killerni ilinniarsimangitsut atuagarsorlutik ilinniartinneqarnissaat, inuussutissarsiutinut ilinniartitaanerit sulinermillu misiliinerit pillugit nunat avannarliit killiit suleqatigiinnerata annertusarneqarnissaanut Islandimi naalakkersuisut, Savalimmiuni naalakkersuisut aammalu Kalaallit Nunaanni naalakkersuisut tapeeqataanissaat Nunat Avannarliit Killiit Siunnersuisoqatigiiffiata siunnersuutigaa, taamaalilluni inuit universitetimi ilinniarsimangitsut ilisimasaminnik piginnaasaminnillu annertusaasinnaaqqullugit taamaalillutillu inuunerminni atukkaminnik pitsanngorsaasinnaaqqullugit suliffissaqarnikkullu periarfissaqarneruleqqullugit. Kingusinnerusukkut nassuiaammi isumassarsianut naapertuuttumik nunat avannarliit killiit akornanni suliaasaqarfiup tamatuma iluani misiligummik suliniutinut aningaasatigut tapiissuteqarneq aqqutigalugu taama suleqatigiinnermik aallartitseqqullugit Nunat Avannarliit Killiit Siunnersuisoqatigiiffiannit nunat kaammattorneqarput.**

*Aallartitat siulittaasuannit Josef Motzfeldtimut saqqummiunneqartoq*

**pillugu**

**Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliap**

## **ISUMALIUTISSIISSUTAA**

**Aalajangiiffigisassatut siunnersuutip aappassaaneerneqarnerani saqqummiunneqartoq**

Ataatsimiititaliap suliarinninnermini ukuninnga inuttaqarpoq:

Harald Bianco, Inuit Ataqatigiit, siulittaasoq  
Andreas Uldum, Demokraatit, siulittaasup tullia  
Juliane Henningsen, Inuit Ataqatigiit  
Doris Jakobsen, Siumut  
Ruth Heilmann, Siumut

UKA 10-mi ulloq 14. oktober 2010-mi siullermeerinerup kingorna Nunat Avannarliit Killiit Siunnersuisoqatigiiffiata aalajangersagaa nr. 3/2009 Nunat Avannarliit Killiit Siunnersuisoqatigiiffianit aalajangiiffigisassatut siunnersuutitut saqqummiunneqartoq ataatsimiititaliap misissorpaa.

**Siunnersuutip imarisaa siunertaalu**

Nunani avannarlerni killerni ilinniarsimangitsut atuagarsorlutik ilinniartinneqarnissaat, inuussutissarsiutinut ilinniartitaanerit sulinermillu misiliinerit pillugit nunat avannarliit killiit suleqatigiinnerata annertusarneqarnissaa aalajangersakkakut kaammattuutigineqarpoq.

Tamatumani siunertarineqarluni inuit universitetimi ilinniarsimangitsut ilisimasaminnik piginnaasaminnillu annertusaasinnaanissaat taamaalillutillu inuunerminni atukkaminnik pitsanngorsaasinnaanissaat suliffissaqarnikkullu periarfissaqarnerulernissaat. Misiligummik suliniutinut aningaasatigut tapiissuteqarnissamut Islandimi, Savalimmiuni Kalaallillu Nunaanni naalackersuisut Nunat Avannarliit Killiit Siunnersuisoqatigiiffianit kaammattorneqarput. Misiligummik suliniut, ilitsersuutit erseqqinnerusut naapertorlugit nunat avannarliit killiit akornanni inuusuttut ilinniartitsisullu paarlaateqatigiinnissaannik neqerooruteqarfiususaaq aalajangersakkami erseqqinnerusumik nassuiaatigineqarpoq.

**Siunnersuutip Inatsisartunit siullermeerneqarnera**

Aalajangersagaq 3/2009 siullermeerinermi partiinit tamanit Naalackersuisunillu annertuumik tapersorsorneqarpoq.

**Ataatsimiititaliap siunnersuummik suliarinninnera**

Ilinniartitaanikkut, piginnaasanik qaffassaanikkut ineriartortitsinikkullu nunat avannarliit killiit suleqatigiinnerunissaat ataatsimiititaliamit ilassilluarneqarpoq. Ilinniarsimangitsut piginnaasa qaffassarneqarnissaannut periarfissat aalajangersakkakut immikkut siuarsarniarneqarnerat ataatsimiititaliamit assut tapersorsornartutut isigineqarpoq, taamaalillutik taakku piginnaasaqarnerulerlutillu ilinniagaqarnissamut periarfissarpassuarnik atuinissamut kajumilersinneqassammata. Tamatumani suleqatigiinnissat aggersut inuiaqatigiinni suliffissaaleqinerpaanut immikkut sammitinneqarsinnaasut imaluunniit suleqatigiinnernut inunnut ataasiakkaanut ineriartuutaallutillu kajumilersitsinnaasunut sammitinneqarsinnaasut ataatsimiititaliap isumaqarpoq.

Aningaasatigut atugassiissutaareersut iluini suliniut pineqartoq Naalackersuisunit taperneqarsinnaasoq ataatsimiititaliap iluarisimaarlugu maluginiarpaa.

Suliniut pineqartoq piviusunngortinneqareerpat taassuma nalilerneqarneranik Naalackersuisut ataatsimiititaliamut nassiussinissaat ataatsimiititaliamit kaammattuutigineqarpoq.

**Ataatsimiititaliap isumaqatigiittup taama oqaaseqarluni aalajangiiffigisassatut siunnersuut taama iluseqarluni akuersissutigineqassasoq inassutigaa.**


Taama oqaaseqarluni ataatsimiititaliap aalajangiiffigisassatut siunnersuut inaarutaasumik aappassaaniigassanngortippaa.




Harald Bianco




Andreas Uldum



Juliane Henningsen



Doris Jakobsen



Ruth Heilmann